



蜀中名勝記卷之六

唐書

閩中曹學佺能始著

成都府六

灌縣

成都記云江水出羊膊山北連甘松至于灌口永康軍志漢文翁爲守穿湔江水堰流以灌平陸春耕之際需之如金號曰金灌口也○李膺益州記曰湔水路西七里灌口山古所謂天彭闕也華陽國志望帝之時會有水災其相開明決玉壘以除水害遂委以政事已而禪位於開明之西山隱焉按今灌口鎮有

望帝祠存○道將又云秦李冰爲蜀守知天文地理  
謂汶山爲天彭門乃至湔及縣見兩山相對如闕彷彿  
若有神見遂於水上立祠三所祭用三牲珪璧沉瓊  
漢興數使使者祭之按揚雄蜀記李冰以亡者過天  
彭闕精靈數見焉○元和志灌口鎮在導江縣西二  
十六里後魏置自灌口坂迄千頃山五百里間兩岸  
壁立有瀑布飛流十里而九昔人以爲井陘之地寰  
宇記云唐貞觀於灌口鎮立鎮靜軍宋改爲永康軍  
矣杜甫野望因過常少仙詩野橋齊度馬秋望轉悠  
哉竹覆青城合江從灌口來入村樵徑引嘗果栗園

開落盡高天日幽人未遣回岑參聞崔十二侍御灌  
口夜宿報恩寺詩聞君尋野寺便宿支公房谿月冷  
深殿江雲擁迴廊燃燈松林靜煮茗柴門香勝事不  
可接相思幽興長蘇軾送鮮于都曹歸蜀灌口舊居  
詩薊盡霜鬚照碧銅依然春雪在長松朝行犀浦催  
收芋夜渡繩橋看伏龍莫歎倦游無駟馬要將老健  
敵千鍾子雲二世惟身在爲向西南說病容○水經  
註曰江水又歷都安縣卽汶山郡治劉備之所置也  
有桃關及漢武帝祠李冰作大堰於此立碑六字曰  
深淘潭淺包隄隄者於江作壩壩有左右口謂之湔

蜀中名勝 卷之六  
三  
壩江○古今集記曰李冰使其子二郎作三石人以鎮湔江五石犀以厭水怪鑿離堆山以避沫水之害穿三十六江灌漑川西南十數州縣稻田自禹治水之後冰能因其舊跡而疏廣之今縣西三十三里犍尾堰索橋有李冰祠按卽崇德廟也宋扈仲榮仕爲監永康軍崇德廟卽此○范石湖離堆詩序云沿江兩厓中斷相傳秦李冰鑿此以分江水上有伏龍觀是水鎖孽龍處蜀漢水涸則遣官致祭壅都江水以自足謂之攝水民祭賽者率以羊歲殺羊四五萬計其詩云殘山狼石雙虎臥斧跡鱗皴中鑿破潭淵油

油無敢唾下有猛龍拴鐵鎖自從分流注石門西州秔稻如黃雲割羊五萬大作社春作伐鼓蒼煙根我昔官稱勸農使年年來激西江水成都火米不論錢絲管相隨看蠶市○註水經曰江水由湔壩江入郫江檢江以行舟益州記曰江至都安堰其右檢其左其正流遂東郫江之右也因山頽水坐致竹木以漑諸郡又羊摩江灌江西於玉女房下作三石人於白沙郵郵在堰官上立水中刻要江神水竭不至足盛不沒腰是以蜀人旱則藉以爲漑雨則不遏其流故記曰水旱從人不知饑饉沃野千里世號陸海謂之

蜀中名勝 卷之六  
天府也俗謂都安之堰亦曰湔堰又謂之金堤左思蜀都賦云西踰金堤者也諸葛亮北征以此堰農大國之所資以征丁千二百人主護之有堰官李膺記云玉女房鑿山爲穴深數十丈中有廊廡堂室屈曲殆若神功非人力矣○蜀志後主登觀坂看汶江旬日始還成都華陽國志益州刺史皇甫晏至都安屯兵觀坂從事何旅曰今所安營地名觀坂上反在下其徵不祥不從果爲牙門張和所殺○隄堰志曰粵自神禹導江正源至石紐出汶川而南其北無水秦昭襄王時蜀守李冰鑿離堆虎頭於江中設象鼻七

十餘丈首濶一丈中濶一十五丈後一十三丈指水一十二座大小釣魚護岸一百八十餘丈橫瀦洪流故曰都江以分岷江之水北折而東灌漑蜀郡曰疇以億萬計蜀用富饒號稱陸海於所逼處又設護岸蓋籠石附岸水不蠹土而渠可堅久指水數十餘處如象鼻狀以扞之皆冰之所作也都江口舊有石馬埋灘下凡穿洶必以離堆石記爲準號曰水則其下洶深二丈二尺而水則下亦深七八尺石渠水口橫一丈五尺從一百二十丈深六尺石洞水分爲三曰灌田水口橫一丈從一百二十丈深六尺曰彭州水

口橫三丈又分爲二其一從十有五丈深五尺其一從四十丈深三尺曰將軍橋水口橫二丈三尺從四丈深三尺外應水口橫四丈從一百四十丈而中分之上流深六尺下流二尺保堂水口橫一丈五尺從一百三十丈深四尺倉門水口橫八尺從五十丈深二尺馬騎水口橫六丈從二百九十丈深二尺鼓甓石趾水口橫二丈五尺從六十丈深二尺東穴水口橫三尺從一百五丈深五尺投龍水口橫五丈從八十丈深三尺北水口橫四丈從一百八十丈深三尺鐵溪水口橫一丈從六十丈深二尺擲下水口橫

五丈從一百二十丈深三尺五徒水口橫三丈從六十丈深一尺歲以爲度過與不足其害立見由漢以來數千百年或因舊葺治或因時疏築而功實原於秦守冰故歷代廟祀之所謂馬騎水口者東南六七里間有堤名上馬騎下馬騎各長二百餘步世傳冰駐馬於此督工後訛以騎爲隄也○宋史曰沫水出蜀西徼外今陽山江大皂江皆爲沫水入西川嘉眉蜀益間夏潦洋溢必有衝決可畏之患自秦李冰鑿離堆以分其勢一派南流于成都以合岷江一派由永康至瀘州以合大江一派入東川而後西川沫水

之害減耕桑之利溥矣皂江支流迤北曰都江口置大堰疏北流爲三曰外應漑永康之導江成都之新繁而達於懷安之金堂東北曰三石洞漑導江與彭之九隴崇寧濛陽而達于漢之雒東南曰馬騎漑導江與彭之崇寧成都之郫温新都新繁成都華陽三流而下派別支分不可悉紀其大者十有四自外應而分曰保堂曰倉門自三石洞而分曰將軍橋曰灌田曰雒源自馬騎而分曰石址曰鼓兜曰道溪曰東穴曰投龍曰北曰樽下曰五徙而石渠之水則自離堆別而東與上下馬騎乾溪合凡爲堰九曰李光曰

膺村曰百丈曰石門曰廣濟曰顏上曰弱水曰濟曰導皆以隄攝北流注之東而防其決離堆之南實支流故導以竹籠石爲大隄凡七壘如象鼻狀以捍之離堆之趾舊鑿石爲水則則盈一尺至十而止水及六則流始足用過則從侍郎堰減水河泄而歸諸江歲作侍郎堰必以竹爲繩自北引而南準水則第四以爲高下之度江道旣分水復湍暴沙石填委多成灘磧歲暮水落築堤壅水上流春正月役工濬治謂之穿淘有碑刻熙寧制書云凡創水磴碾有妨灌漑民田者以違制論○元史曰蜀堰舊爲李冰作歷數

千百年所過衝崩蕩鬻又大爲民患有司以故事歲至隄防一百三十有三所役兵民多者萬餘人少者千人其下充數百人役凡七十日不及七十日雖事治不得休息不役者日出三緡爲庸錢由是富者屈於貲貧者屈於力上下交病會其費歲不下鉅萬緡大抵出於民者什九藏於吏而利之所及不足以償其費元統二年僉四川肅政廉訪司事吉當普巡行周視得要害三十有二處餘悉罷之召灌州判官張弘計曰若甃以石歲役可罷民力可蘇弘遂出私錢爲小堰堰成暴漲不動乃具白行省及蒙古軍七翼

之長郡縣守宰下及鄉里之老各陳利害咸以爲便於是徵工發徒卽都江舊蹟而治之鹽井關限其西北水西關據其西南分江導水因勢瀦堰以鐵六千斤鑄大龜貫以鐵柱鎮其江源然後諸堰皆甃以石範鐵以關其中以桐油石灰雜麻絲搗熟密苴罅漏岸善崩者築江石以護之上植楊柳旁種蔓荆櫛比鱗次賴以爲固所至或疏舊渠以導其流或鑿新渠以殺其勢遇水會則有石門泄蓄自是水利省臺上其功詔揭奚斯記之是役石工金工皆七百人木工二百五十役徒三千九百蒙古居二千糧千石有奇



石材萬餘灰六萬餘斤油半之鐵六萬五千斤麻五  
千斤共四萬九千有奇緡工畢官積餘二十萬一千  
八百緡責灌守以貸于民歲取其息以備祭祀淘灘  
脩堰之費仍免灌之兵民常役俾專力堰事焉○舊  
經云太初蜀王征西番野人以壺漿爲獻王使投之  
江中三軍飲之皆醉因名味江寰宇記云味江水出  
青城長樂山下江中有大石高數丈號大坎又有小  
石在其下亦高數丈爲小坎水激其上洶湧聞于數  
里古老傳云味江水甘美人爭飲之因名青城外史  
云卽今漩口江也江口石有名大險小險或卽坎之

轉音大坎石磴逶迤其傍深林老樹猿猴纍纍掛樹  
間春夏水至則沒路矣○水經註云都安縣渡江有  
竿橋按所謂索橋溜筩皆其遺制也唐獨孤及竿橋  
贊曰相引一索人綴其上如猱之縛轉帖入淵如鳶  
之落尋橦而上如魚之躍頃刻不戒霄無底壑志云  
縣西二里有橋曰珠浦卽索橋也其制兩岸塹石爲  
穴捷石爲籠夾植巨木屹砥湍流編竹繩跨江橫濶  
一丈離水面五尺長百二十丈方輿勝覽云繩橋前  
有翠圍山山上道院古王仙柯燒丹之處在永康縣  
西八里范成大過青城題索橋詩織篔勻鋪面排繩

疆架空染人高曬帛獵戶遠張罾薄薄難承雨翻翻  
不受風何時將蜀客東下看垂虹志云溜笕橋在縣  
西六十里兩岸石柱以竹繩橫牽斲木爲笕狀似瓦  
覆繫繩上渡者以麻繩縛懸笕下仰面緣繩而過南  
通滋茂鄉與汶川界今易爲繩橋○古今集記云縣  
西十餘里有虛閣棧道二十五里有石笕閣道三十  
里龍洞閣道○碑目云距紫屏山二里許道旁有漢  
石刻三皆治道記也其一曰建平五年孝哀時刻也  
其二曰永平元年孝明時刻也在范公平磨崖之西  
○成都記云古魚鳧國治導江縣寰宇記曰導江縣

本都安縣地太康地志云都安劉先主置屬汶山郡  
周武帝併入益州之郫別於灌口置汶山縣唐武德  
元年改爲盤龍縣尋改爲導江李膺記云山土色黃  
盤迴有龍形故曰盤龍外史云盤龍山不言所在今  
學宮之右有金龜山壤黃而形蜿蜒者是也○志云  
導江廢縣在東二十里導江舖元爲巡檢司時土城  
尚在今悉平爲田初孟蜀改導江爲灌州宋改永康  
軍尋廢熙寧七年趙抃知成都乞復永康軍嘉定二  
年知軍虞剛簡上五事曰本軍近接威茂并青城一  
帶山不五七十里卽是夷界唐吐蕃入寇自此途出

又距成都百二十里而近其爲緊切甚于雅黎○方輿勝覽云玉壘堂致爽軒俱在軍治范至能詩夕陽塵外漲郊墟六六峰頭夢覺餘竹色喚人來下馬亂蟬深處有圖書陸務觀和云黃塵赤日汗沾裾竹裏煎茶喜有餘堪笑放翁窮意巧就君池館讀君書子焯和云團團竹色遶郊居勾引清風百畝餘憶昔敲門蘇內翰而今下馬范中書○紀勝云廣莫亭在軍北朝天門太守呂汲公建李壁記曰危簷飛檻負城四出觀覽之勝甲于東南出金馬門過朝天寺登廣莫亭憑欄下視一目千里矣又有花洲在軍城南百

步王子俊爲賦魏華父記○碑目云唐貞觀十三年韋作觀魚碑在軍城五里北山朝天寺又云唐人徐浩書金剛經在導江天宮院今刻之石又云導江縣北迎祥寺鐘樓內有刻字不記年月觀其有節度押衙字卽爲唐末五代間刻也寺有老泉爲記東坡書碑刻俱存○志云縣西二里崇德廟李文饒鎮蜀時重建段全暉爲記廟內有八分書聖水池碣近年掘地得之移入成都墨池按方輿勝覽聖水池在永康縣西一舍妙真觀觀昔有女子上昇仙洞藥爐尚存不知碣何以在崇德廟○碑目云唐吳行魯碑在導

江縣北鬪雞臺有古碑刻字畫磨滅蓋唐大中十一年治隸彭州時吳爲長史所建又云僞蜀王建之子嘉王宗壽與能仁院僧卯往來書劄二十餘簡存于龍門院墨迹宛然如新按張商英龍門院本末記院在永康縣六里青城大面三十六峰嵯峨萬仞盡在軒檻間其詩云四時積雪瞻岷嶺三派飛泉出洞天卽此地○寰宇記云司馬相如墓在導江縣東十里又有楊妃池今爲唐氏之居按太真外傳楊玄琰爲蜀州司戶生貴妃于此妃兒時嘗誤墮此池志云在縣東二十里今爲丘洪二姓宅○陳後山云王蜀花

蕊夫人姓費氏青城人也圖經相傳有花蕊舊宅不知其處費氏尚有齋存詳見詩話○方輿勝覽云蠶崖關在導江縣五十里以振西山之走集外史云關去縣二十里寔汶川地有巨石高丈餘峙山之麓土人云此蠶崖石也關以此得名志云關當縣西岷江之北松茂驛路之衝周武天和二年初立石路巉稜如簇蠶因名杜少陵詩蠶叢鐵馬瘦灌口米船稀卽此宋熙寧五年重建元末燬于兵火今置巡司關外有市謂之蠶崖市宋史韓忠憲公子紺繼知成都日所遷以爲夏夷互易之地蓋絕西羌窺伺之端云金

部格曰勅松當悉維翼等州熟羌每年十月已後卽來彭州互市法司差上佐一人於蠶崖關外依市法至市場交易勿令百姓與往還○志云玉壘山去縣三百里衆峰叢擁遠望無形惟雲表崔嵬稍露山石瑩潔可爲器亦砒砒之類唐貞觀初關於其下名玉壘關亦曰七盤關乃番夷往來之衝也○碑目云玉壘關碑唐大中十年白敏中帥蜀日建關旁有大碑卽幕府陳可度頌功德之碑岑參酬崔十三侍御登玉壘山思故園見寄詩玉壘天晴望諸峰盡覺低故園江樹北斜日嶺雲西曠野看人小長空共鳥齊高

山徒仰止不得日攀躋崔信明送金敬陵入蜀詩金門去蜀道玉壘望長安豈言千里足方尋九折難西上君飛蓋東歸我挂冠猿聲出峽斷月影落江寒從今與君別花月幾新殘○李膺益州記云齊永明初置齊基縣於青城山東築土城週五里周地圖記云武帝改齊基爲青城縣因山名也志云廢青城在今縣西四十里散入大樂其亭二鄉○名山記曰益州西南青城山一名青城都山形似城其上有崖舍赤壁張天師所治處南連峨眉亦有洞天諸靈書所藏不知當是第幾洞天也○玉匱經曰青城山爲第五

大洞寶仙九室之天一名赤城山對蜀郡之西北在岷山之南杜光庭記云岷山連峰接岫千里不絕青城乃其第一峰耳高三千六百丈周匝五千里霧仙所宅祥異則多於是有瑤林瓊樹金沙玉田甘露芝草天池醴泉之異焉福地記中國名山以青城峨眉爲西嶽佐理又三佐命山及十大洞天皆有青城之名○楊用脩蜀志補鱗云青城山有一百八景風日佳時登儲福宮望之歷歷可數曰彭祖峯曰石鑑峰曰龍牙峰曰野雲溪曰藏雲塢曰齊雲榭曰垂虹亭曰捎雲閣曰觸石軒曰臥雲庵曰青溪曰碧桃溪曰

芙蓉溪曰躑躅溪曰海棠溪曰溪光亭曰過溪橋曰乳泉曰滴珠泉曰檻泉曰清風湖曰鑑湖曰荻花洲曰蓼嶼曰碧霞洞曰斜川曰曲水曰紫霞洞曰鑑橋曰藥圃曰紫薇洞曰醑醑洞曰清陰橋曰綠篠橋曰玉微亭曰紅霞塢曰爛柯亭曰灌稻泉曰翠光亭曰茅堂曰紫陽洞曰桃源曰暗香亭曰金華堂曰舸齋曰蕙谷曰黃梅嶺曰煎茶溪曰芹浦曰鸚鵡林曰葦廬曰野人澗曰柘坪曰寶遂社曰紗高峰曰娑羅坪曰木蘭岫曰桂香亭曰石寶曰白蘋洲曰藻壑曰望岷岬曰豹谷曰百花潭曰鹿關曰瑞香嶺曰芝畦曰

瑞荷塘曰兼葭渚曰黃浦曰菱灣曰芭蕉谷曰直釣  
亭曰和芳隴曰金棖徑曰橘徑曰鑑雉泓曰芙蓉島  
曰歲寒洞曰葦杭曰棲真洞曰望仙坡曰黃葵坡曰  
鳳簫樓曰跨鳳亭曰牛關曰馭鶴峰曰化城洞曰望  
闕臺曰凝碧溪曰玉女潭曰寶陀岩曰萼坡曰藏春  
島曰桂子谷曰九曲池曰華海曰江梅島曰水仙匯  
曰蒼葡萄崗曰丹臺曰浴丹池曰曝藥臺曰芳草渡曰  
采薇汀曰金絲堤曰菖蒲谷曰種茶岩凡一百有八  
也○唐耿湜送崔明府赴青城縣詩清冬賓御出蜀  
道翠微間遠霧開羣壑初陽照近關霜潭浮紫菜雪

棧繞青山當似遺民去柴桑政自閒錢起賦得青城  
山送楊杜二郎中赴蜀軍歌蜀山西南千萬重仙經  
最說青城峰青城嶽岑倚空碧遠壓峨眉吞劍壁錦  
屏雲起易成霞玉洞花明不知夕星臺二妙逐王師  
阮瑀軍書王粲詩日落猿聲連玉笛晴來山翠傍旌  
旗綠蘿春月營門近知君對酒遙相思岑參寄青城  
龍谿負道人詩五嶽之丈人西望青霄雲開露崖  
崙百里見石稜龍谿盤中峰上有蓮花僧絕頂小蘭  
若四時嵐氣凝身同雲虛無心與谿清澄誦戒龍每  
聽賦詩人則稱杉風吹袈裟石壁懸孤燈久欲謝微

祿誓將歸大乘願聞開士說庶以心相應崔塗寄青城山巔禪師詩懷師不可攀師住杳冥間林下誰聞法塵中只見山終年人不到盡日鳥空還曾聽無生說應憐獨未間賈島送靈應上人詩遍叅尊宿遊方久名嶽奇峰問此公五月半間看瀑布青城山裏白雲中宋紫微孫處士送青城丈人詩深羨青城好洞天白龍一覺幾千年鋪雲枕石長松下朝退看書盡日眠趙抃入蜀先寄青城張遨先生詩踰年青社得徘徊一日皇華下詔催蜀道五千馳驛去秦關百二拂雲開不同叅政初時入也似尚書兩度來到日先

生應笑我白頭猶自走塵埃又遊青城詩三十六峰峻維岷在蜀奇方行刺史部重欵丈人祠凍雪諸蕃隔晴雲大面披訪仙窮寶洞勅鬼覘豐碑泉落寒崖響蘿依古木垂良工存舊筆老叟琢新詩陟險齊雙屐逢幽鼓七絲盤桓不忍去還作更來期范成大青城山詩萬里清遊不暇慵雙旌換得一枝筇來從井絡直西路上到江源第一峰海內閑身輸我佚山中佳氣爲人濃題詩試刻巖前石付與它年蘚暈重○李膺記云入山七里至赤石城有羊馬臺三師壇上五里至瀑布水澗二百步有二石梯有一石筍高三



丈過二石門絕崖數百丈下起常道觀高峰下有水  
六時灑落東北有二石室名龍宮可容百餘人從龍  
宮過石室至石梯名龍橋又有一石梯洞穴深邃莫  
知所極西北有石室宛然見存又有黃帝壇石法天  
地上圓下方濶一丈二尺有十二角觀東石刻日月  
各闊五尺厚一尺二寸相對柱上烏兔輝爍方圓磅  
礪可觀○五岳真形圖云洞天所在之處其下別有  
日月分精以照其中龍橋處二山相去百餘步峯巒  
危竦相對橋在峰首橋之半漸漸促小可六七寸長  
一丈五尺兩邊懸崖俯臨不測山傍有誓石天師張

道陵與鬼兵爲誓朱筆畫山青崖中絕今驗斷處石  
並丹色濶二十丈深六七丈望之絕然也○青城甲  
記黃帝封青城山爲五嶽丈人乃嶽瀆之上司真仙  
之崇秩一月之內羣嶽再朝焉續博物志青城縣歲  
春秋以蔬饌享丈人山令躬行禮蓋蜀之望山也有  
丈人觀在青城北二十里碑目云丈人觀四碑大殿  
右功德碑鄭敖書殿上祝文碣進士任璠文三門下  
置觀碑徐大亨文三門右紀符瑞碣甘遺榮八分書  
杜甫詩云自爲青城客不唾青城地爲愛丈人山丹  
梯近幽意丈人祠西佳氣濃綠雲擬住最高峯掃除

白髮黃精在君看他時冰雪容李真六言詩春凍曉  
韉露重夜寒幽枕雲生豈是與山無素丈人着帽相  
迎真蓋唐末仙人也陸游謁丈人觀詩黃金篆書榜  
朱門夾道巨竹屯蒼雲岩巔劃若天地分千柱眈眈  
壓其根纓冠笑謁丈人君廣殿空庭吹寶薰摩挲畫  
墻手爲皴異哉山夔與土獷物怪齷齪冠丘墳僊人  
佩玉雜悅怱手整貂冠最不羣欲去不忍恨日曛道  
翁採藥晝夜勤松根茯苓獲兼斤人芝植立強骨觔  
枸杞羣吠聲狺狺山爐小甌炊幽芬朱顏不飲常自  
醺我亦宿誦五千文一念之差墮世紛逝將從翁走

如麋隱書秘訣何由聞又題丈人觀道院詩斷雲浮  
月磬聲殘木影如龍布石盤偶駕青鸞塵世窄閑吹  
玉笛洞天寒奇香滿院晨炊藥異氣穿巖夜浴丹却  
笑飛仙未忘俗金貂猶帶侍中冠按務觀二作多詠  
范長生事其劍南詩藁云青城山有孫太古畫碧落  
侍中范長生舉手整貂蟬像特妙其詩又有浮世深  
沉何足計丹成碧落珥貂蟬之句○方輿勝覽云碧  
落觀卽長生觀在青城山北二十里昔有范寂字無  
爲劉先主時棲止青城山中以脩煉爲事先主徵之  
不起就封爲逍遙公得長生久視之道劉禪易其宅

爲長生觀觀有古栴高數十尋圍三十尺世傳長生  
手植胡叔豹詩更斲盤根藏大藥也令嘉樹得長生  
卽此觀有赤城閣臨眺甚遠外史云唐明皇登青城  
於長生觀駐輦故志謂長生是玄宗別殿雖就傾圮  
遺砌儼然唐求長生觀詩數里緣山不厭難爲尋真  
訣問黃冠苔鋪翠點仙橋滑松織香梢古道寒晝傍  
綠畦嫋嫩玉夜開紅竈燃新丹鐘聲已斷泉聲在風  
動茅花月滿壇○乙記云上清宮上皇殿延慶宮皆  
明皇幸蜀時造吳船錄云上清宮在最高峰之頂以  
板閣挿石作堂殿下視丈人峰直墻堵耳岷山數百

峰悉在欄檻下如翠浪起伏勢皆東傾孫知微詩臺  
殿壓平青嶂頂松杉挿破白雲根者此也勝覽云晉  
朝起天宮於高臺山丈人祠側號曰上清宮其東北  
麓卽天師種粟之處上有天池夜則神燈飛行遍空  
或謂草木之精所爲王叔瞻詩神燈點點光可燭星  
斗熒熒低欲捫卽此宮庭又出瑞聖花見方物記○  
晉時又於丈人峰前建上皇觀蜀志補罅云亦名玄  
真觀神芝異草嘉樹名花皆生於此芝草如稻苗食  
之可仙唐章孝標上皇觀詩煙霞華蓋七星壇想像  
先朝駐禁鑿輦路已平栽藥地皇風猶在步虛壇樓

臺層氣晴蕭索杉檜龍身老屈蟠翻感惠休并李郭  
劍門空處望長安○延慶宮卽常道觀也勝覽云自  
會慶宮西行一二里有常道觀乃古黃帝祠址隋建  
甲記云大業七年太常博士陰道碑在常道觀軒轅  
石龕下軒轅臺獨秀霞表下望衆山若蟻垤連抱之  
樹若薺志云石龕今呼天師洞有張天師像及唐碑  
字畫完好可揭碑文曰勅益州長史張敬忠頃者西  
南阻化徃役殷繁山川旣接於夷戎縣道有勞於轉  
輸自卿鎮撫百姓咸安革弊遷訛良多慰沃歲陰寒  
極比安好今賜卿衣一副至領之蜀州青城先有常

道觀其觀所置元在青城山中聞有飛赴寺僧奪以  
爲寺州旣在卿節度檢校勿令相侵觀還道家寺依  
山外舊所使道俗兩所各有區分今使內品官王懷  
景道士王仙卿往蜀川等州故此遣書指不多及右  
勅明皇行書開元十二年歲次甲子閏十二月十五  
日下十三年正月一日至益州二日至蜀州專檢校  
移寺官節度使判官彭州司倉參軍楊壽蜀州刺史  
平嗣先青城縣令沈從簡常道觀主白遺榮勒字右  
款八分書碑目云延慶移觀手詔碑在觀後絕峰之  
上石龕中韓擇木八分書記銘在延慶靈寶真人五

符神幢下開元十二年立志云延慶觀亦名昭慶文  
與可昭慶觀詩琳崖盤玉霄彩翠接步武雲霞不可  
畫泉石固難譜神幢逾百尋帝轍歷萬古靈瀑誰與  
窮長飛六時雨所謂神幢卽五符幢也○碑曰唐玄  
宗真容碑在六時岩下按志明皇像亦在天師洞或  
以爲孟昶像也錄異記云六時水在宗玄觀南二里  
對觀有峭厓高五百餘尺厓上授道垓昔甯真君與  
軒轅帝傳道之所每日六時有自然水從厓上灑入  
澗底有石龕刻玄宗皇帝御容勝覽云常道觀南有  
六時水云六時灑水以代晷漏陰時卽飄然而灑陽  
時則無呂汲公詩巖輝萬古照泉漏六時飛京鏗詩  
八千里隔東西境十二時分晝夜泉卽此又有石日  
月日在延慶觀東北月在溪西崖中並徑五尺六寸  
半一曰石天地天形有十二角地形正方闊六七尺  
或云卽誓鬼壇也○方輿云鬼城山在丈人觀西北  
又云常道觀北有張天師誓鬼壇志云漢時龍穴出  
水暴害禾稼張道陵立石臺以鎮之名誓鬼臺甲記  
曰壬子七月十三日鬼城山崩瀑水大至山高百餘  
丈丈人觀居其下將憂摧壞俄有大石墜下堰水向  
東竟免漂陷初觀中資溪水日用負汲爲勞自瀑水

之後流泉直注厨下甘美不竭碑目云昔天師自鬼  
城山駟鬼於絕域有鬼界古碑字畫磨滅不知年代  
又云天師戒鬼筆迹在大龍橋側深一十三丈濶十  
三丈○輿地紀勝云清都觀在延慶上二三里一名  
洞天觀唐道士薛昌浴丹井杜光庭墓俱在觀後薛  
昌卽飲昌陸酒得道者文潞公鎮蜀日市觀側隙地  
以贈張俞所謂白雲隱居也其下白雲溪出焉任宗  
易詩懶隨六詔上丹闕高臥一峰藏白雲少愚自題  
云欲作外臣誰是友白雲孤鶴在岩扉○杜廣成曰  
延慶觀南天倉山神仙以爲帑庫有三十六峰前十

八曰陽峰後十八曰陰峰河圖括地象白沙一百八  
景青城三十六峰謂此也晁公遡詩天峰夜半剪冰  
花三十六峰如玉立趙雄詩三十六峰如不到青城  
還似不曾遊○勝覽云天倉下儲福宮有唐睿宗女  
玉真公主像宮有天峰閣望三十六峰如列屏沈少  
南詩割盡齊封奉魯元更開泌水占名園何如帝子  
空山外落日騎驢芳草原胡叔豹詩弃形如遺但養  
神阿兄爛醉梨園春人百撼之耳不聞何物女子乃  
獨醒徑來空山臥白雲不見漁陽胡馬塵文同天倉  
山威儀觀詩羣峰削瓊瑤老蘚抹古綠應朝大岷去

簪笏儼相逐珠宮秘仙仗錦笈藏寶籙上帝此爲倉  
其田堪種玉○蜀檮杌咸康元年九月王衍與其母  
太后太妃同禱青城宮人畢從皆衣雲霞之衣衍自  
製甘州詞令宮人歌之佳山中旬日設醮祈福太后  
太妃又謁王先主鑄像已幸丈人玄都二觀及金華  
宮夫人李舜絃隨駕詩曰因隨八馬上仙山頓隔埃  
塵物象間只恐西追王母宴却憂難得到人間○志  
云金華在丹景玉華在青城陸游青城山夜登玉華  
樓木蘭花慢詞云閱邯鄲夢境歎綠髮早霜侵柰華  
岳燒丹青谿看鶴尚負初心年來向濁世裏悟真詮

秘訣絕幽深養就金芝九畹種成琪樹千林星壇夜  
學步虛吟露冷透瑤簪對翠鳳披雲青鸞遡月宮闕  
蕭森琅函一封奏罷自鈞天帝所有知音却過蓬壺  
笑傲世間歲月駸駸○乙記云青城有天國寺玉賈  
經云青城一名青城都一名天谷山谷音近國卽天  
國也方輿勝覽天國山在永康縣左連大面右連鶴  
鳴前臨獅子後枕大隋上有龍池及融照寺按卽天  
國寺也云是黃帝築壇封竈封處未詳唐真人張令  
問隱居於此號天國山人以詩寄杜光庭曰試問朝  
中爲宰相何如林下作神仙一壺美酒一爐藥飽聽

松風清晝眠山有玉女洞亦曰素女碑目隋刺史薛道衡磨厓碑在玉女洞後矣五嶽圖曰青城山七十二小洞應七十二候八大洞應八節玉女其一也玄中記曰青城洞穴分三孔西北通崑崙外史言有李氏好道嘗率丁夫持炬賫糧入山下古洞行三日至一大溪不得涉而止比出洞口石自合迷不知處○寰宇記云聖母山高二千餘丈週三十餘里其南有深洞在八大洞之數傍便山高下與青城相接當吐蕃之界谿谷深邃夏積冰雪所以限夷夏也大面山在三溪北杜光庭曰前號青城後曰大面其寔一耳

按此溪水色黑又名黑水溪雲笈七籤隋褚聖母黑水溪人悟達國師題其居爲聖母院山亦從而名之宋時山中有二隱士一曰譙先生定字天授建炎初召至揚州留入講筵不可拜通直郎致仕百三十餘歲猶存巢徑險絕人不能到先生數年輒一出山前人亦罕有見之者一曰姚太尉平仲字希晏靖康初在圍城中夜率將士攻賊營不利騎駿驢逸去建炎初所在揭榜以觀察使召之不出淳熙間有于丈人觀道院見之年近九十紫鬚長委地蓋皆得道于山中也○錄異記青城縣西北二里有老君觀門東上



有一泉號馬跑泉水味甘美四時不絕春夏如水秋  
冬反溫昔老君與天真皇人會真之所其泉是老君  
所乘馬跑成卽冲妙觀也碑目冲妙觀記杜光庭撰  
○勝覽云飛赴寺在青城縣飛赴山下舊名昌聖院  
乃唐左軍容使嚴君美捨宅有四望亭呂汲公詩最  
勝西峰下林梢四望亭江山觀掌握梁益布丹青文  
陵州詩平林露層巘上獨置孤寺羣仙馭飛駕往往  
赴於此風光幡影亂日落鐘聲起誰可謂詩豪與來  
吟萬紙○志云香積山寺卽靈岩寺也有瀑布及鷄  
骨禪師塔卽周地圖之通靈山寺又云今縣東南四

十里承天寺有馬祖靈骨塔高丈六尺俗呼爲馬祖  
寺有碑云大曆間靜照頭陀建雲峰道場至宋宣和  
奪以予黃冠者於是師之靈谷與塔俱遷建炎三年  
復還舊物建塔於故址柝生石合讖記冥符焉紹興  
元年立石○碑目云青城寶幢院記元和十四年立  
觀音院記乾符二年立改海晏寺記中和二年立俱  
在海晏殿中○艾子云蜀青城山老人村有五世孫  
者道極險遠生不識鹽醢而溪中枸杞根如龍蛇飲  
其水故壽近歲道漸通漸能致五味而壽亦益衰方  
輿勝覽老人村在大面山之北昔人避難其中多享

年壽故名或云潛夫張不羣入山採藥浹旬不返見一叟致敬而問荅曰本丞相范賢之裔知李雄之祚不永挈吾輩居此爲終焉之計圖經云卽老澤也在青城北百三十里昔諸葛亮遷羣獠于山下故名○碑目云獠澤水石記在路次石門崖壁上吳行魯大中七年奉使巡邊行所鑄按志獠澤關在縣西南百里乃董卜胡通華捷徑也○古今記云老人村有牡丹坪王漑序謂有牡丹高數十丈花開盈一尺范至能詩十丈牡丹如錦蓋人間姚魏敢爭春卽此方與勝覽云牡丹坪者自青城之長平山捫蘿而上歷鳥道三十里許有平阜數十畝高樹蔽天春深先花後葉狀如芙蓉香類牡丹譙定天授季浩太素二先生隱其中云

蜀中名勝記卷之七

閩中曹學佺能始著

成都府七

崇慶州

王勃送杜少府之任蜀州詩城闕輔三秦風煙望五  
津與君離別意同是宦遊人海内存知己天涯若比  
隣無爲在岐路兒女共霑巾宋之問送趙少府之蜀  
州詩餞子西南望煙綿劍道微橋寒金鴈落林曙碧  
雞飛職拜輿方遠仙成履會歸定知和氏璧遙掩玉  
輪輝崇慶在唐稱蜀州也○碑目云天章雲篆碑在

蜀州唐開元壽王清書又云蜀州刺史廳壁記大曆  
年間作以張柬之鍾紹京李峴王縉四公皆牧是州  
故有四相堂唐詩紀事云貞元十四年皇甫澈刺蜀  
州時賦四相詩序云居相位者前後四公謨明弼諧  
遷轉歷比顧已無取忝跡於斯景行遺烈嗟歎不足  
也謹述其行事詠其休美庶將來君子知聖朝之德  
云爾○本志云州治判官廨後池卽罨畫池趙抃有  
蜀倅楊瑜邀遊罨畫池詩占勝芳菲地標名罨畫池  
水光菱在鑑岸色錦舒帷風碎花千動烟團柳四垂  
巧才吟不盡精筆寫徒爲照影搖歌榭分香上酒卮

主人邀客賞和氣與春期○勝覽云文潞公祠在判  
官廳蓋公之父在天禧時來作判官令公受業於晉  
原大夫張錫之客任君後爲立祠○紀勝云西湖在  
郡圃蓋皂江之水皆導城中環守之居因瀦其餘以  
爲湖也范成大吳船錄云蜀州郡圃內西湖極廣袤  
荷花正盛覓湖船泛之繫纜脩竹古木間景物甚野  
游宴繁盛爲西州勝處陆游劍南詩藁云蜀人謂唐  
安有三千官柳四十琵琶故詩云歸心日夜逆江流  
官柳三千憶蜀州致能詩云閑隨渠水來偶到湖光  
裏仍呼水月舟徑度雲錦地誰云不解飲我已荷香

醉湖陰玉娟蟬夏立紅粧外何須東閣梅悠然自興  
思驚風入午暑水竹有秋意采菱不盈掬興與蓴鱸  
會遙知新津宿魂夢亦清麗○碑目云范公鎮留題  
在府城之太平院范遊岷山過此題紀院之經閣上  
云熙寧八年三月遊青城間四日趨峨眉俱過此與  
百世相見百朋百嘉侍行蜀郡公記○志云西南附  
郭龍門街是晉原縣治寰宇記云白馬江自晉原縣  
入新津縣界卽杜甫詩白馬江寒樹影稀者○碑目  
云蜀先主碑在晉原縣西南二里唐房瑄文又云唐  
開元碑天寶八年立在晉原常清觀鮮于仲通文○

周地圖記云晉原西五十六里驀頤山上有鹿市百  
步平坦諸山之鹿日一聚於此○寰宇記云鶴鳴山  
在晉原縣西八十里絕壁千尋李膺益州記張道陵  
登仙之所嘗有白鶴遊其上北與邛州交界又云臨  
邛故城俗名公孫述城益州記云蓋李雄據蜀李壽  
從狎柯引獠入蜀境自象山以北盡爲獠居臨邛舊  
縣因茲置也○志云蜀州有東亭杜甫和裴迪登蜀  
州東亭送客逢早梅相憶見寄詩東閣官梅動詩興  
還如何遜在揚州此時對雪遙相憶送客逢春可自  
由幸不折來傷歲暮若爲看去亂鄉愁江邊一樹垂

垂發朝夕催人自白頭○志云東三十里江原鎮卽漢江原縣治華陽國志江原縣郡西渡大江濱文井江水經云汶井江亦李冰所導井上有守捉三十里上有天馬祠李膺益州記寧州有馬元河河邊牧馬產駿駒一日千里至此斃乏岸南人爲立祠于此水經註小亭山有天馬塚是也○寰宇記云鄴江出麩金一名皂里水自永康軍青城縣百丈水南流入江源界志云皂江逕江原至新津入河昔張道陵投墨于江其水盡黑故名皂江有北橋杜甫詩云望極春城上開筵近鳥巢白花簷外孕青柳檻前梢池水觀

爲政厨煙覺遠庖西川供望眼唯有此江郊○勝覽云杜工部祠在江原縣邑宰趙抃建昔杜甫依高適寓於此○寰宇記云公孫述女冢在江原縣東一十三里高三丈周迴二十步故老傳云此冢銅作絞絡五里故亂離發掘莫之陷也○碑目云唐李百藥碑在江原縣之萬歲寺唐樊知遷碑在江原縣淨居寺顏師古文今俱殘缺又云唐太平公主出家勅在天慶觀按魏了翁江原縣天慶觀雲層臺記略云開禧三年春蜀盜未平江原道士呂元素語其徒曰吾儕小人羣居族食無益縣官今逆氛若此又不能劓刃

賊腹膏首原野盍姑杜門以需底定乃相與校藏書  
見其書有爲九層之臺可以爲民襁診祝釐者則用  
其法而封之名以雲臺列天地日月星辰岳瀆之象  
而禱祠焉○宋皇祐間趙閱道爲江原令其二弟揚  
抗與俱有引流聯句序云江源縣江繚治解址而東  
距三百步瀧湍馳激朝暮鳴在耳使人聽愛弗倦遂  
甬渠通民田來囿亭堦廡間環迴逶旋溝行沼渟起  
居觀遊清快心目公暇事休與弟抗揚坐東軒樂然  
盤桓共爲詩章云別派從江垠邀流入農畎淙淙來  
源深澆澆度溝淺園穿蕭艾芟塹斷荆芝剪疏功浹

晨流漑利千步遠田觀疑澤潴坎聽類瓴建北溟歸  
鑿池幽岳漾裝巘瀉堺穀微駛迴澹珠細轉過寶石  
眼窺經虛吐口吮流行值落葉浸長浮生蘚孤鶴眼  
怪覘纖魚鬣跳展申沉無穢淤底靜有紋塹映葦色  
莫分喧琴韻難辨增霖夕鬧蛙涵月夜驚犬侵篁鞭  
起萌逼水抵垂茵憐黃澆菊籬惜紫沃蘭畹吏治密  
甃甃童戲芒車卷灌攜合手勞激掬致腰俛庭秋臨  
加涼軒夏向消烜我矜近濟能僮賀遙沒免貯卮理  
巨甌歸厨架脩筧供淘飯盍糧給澳羨鼎鬻調藥脩  
舊餌剪茶試蘿薺坐客頻泛觴蹲兒屢洗硯聆寒心

脫煩挹冷酒除面間眺筇步隨靜看髭吟撚高懷造  
文攄清興團詩遣瑰章非俗成怪句自幽選湧詞波  
翻瀛綿意緒抽蠶書丹字隸行款碣石磨琬題爲引  
流篇記耳非自銜

### 新津縣

張天覺以古三墳書得於縣北陽民家墳皆古文傳  
乃隸書天覺新津人○范成大新津道中詩雨後郊  
原淨村村各好音宿雲浮竹色清溜走橙陰曲沼擎  
青蓋新畦藝綠針江天空闊處不受暑光侵予以萬  
曆庚戌過此詩云結束爲津口分明作秀顏雪峰俱

映水天社舊名山客自荆吳外民其叩蜀間昔賢有  
佳句磊落動人寰壬子歲再過此詩云風日何淒緊  
予行在仲冬平林煙已盡近郭渡猶重古市沙中火  
僧樓水際鐘東西雖不辨彷彿認前峰蓋指脩覺山  
也○志云南一里脩覺山神秀禪師結廬於此唐明  
皇駐蹕爲題脩覺山三字寺有左右二井春夏汲東  
秋冬汲西水則甘冽反之則否名曰林泉殆靈泉云  
其下爲三江渡因岷江皂水白馬三江並列而名其  
上爲寶華山橫跨江表俯瞰平川取物華天寶之義  
也峰頂多雪又名雪峰杜甫新津寺寄王侍郎詩何



限倚山木吟詩秋葉黃蟬聲集古寺鳥影度寒塘風  
物悲遊子登臨憶侍郎老夫貪佛日隨意宿僧房又  
遊脩覺寺詩野寺江天豁山扉花竹幽詩應有神助  
吾得及春遊徑石相縈帶川雲自去留禪枝宿衆鳥  
漂轉暮歸愁又寺憶曾遊處橋憐再渡時江山如有  
待花柳更無私野潤煙光薄沙暄日色遲客愁全爲  
減捨此復何之○志又云南二里四安寺亦神秀剎  
杜甫暮登四安寺鐘樓寄裴十詩暮倚高樓對雪峰  
僧來不語自鳴鐘孤城返照紅將欠近市浮煙翠且  
重多病獨愁常聞寂故人相見未從容知君苦思緣

詩瘦太向交遊萬事情○碑目云唐開元皇帝送趙  
仙甫尊師歸蜀詩碑見在新津縣寶真觀○志云南  
二里平岡治下第八治也上應參宿蜀人李阿瞿君  
於此學道有杜天師詩○勝覽云投龍觀在新津縣  
南六里枕夜郎溪及白木水上有龍穴祈禱皆應○  
又云稠稔山在新津南八里有草名稠稔服之長生  
不死上有丹竈古碑宮闕天池軒轅帝於此得仙中  
第四稠稔治也上應危宿○予友竟陵鍾伯敬遊脩  
覺山記云辛亥十月十有九日早發新津叔弟恬不  
知隔江者爲何許山也與童騎疾驅過之予與艾子

後坐舟中指江千削壁千仞竹樹榦桷出沒晴嵐雪浪外者異焉問之則脩覺山子美游脩覺寺詩明皇幸蜀大書脩覺山三大字嵌石壁今猶存者卽其處也決策登焉所從徑哀山石之複者爲磴亂整枉直各肖其理登者屢憇憇處每平平處每當竹樹隙隙處必從其下左方見江江錯磧渚或圓或半或逝或返去留心目間土人縛竹爲亂若童子置葉盎中以度蟻設身處地頗危之從上視下輕且駛甚適也度磴去頂可四五之一行住坐立更端者數矣其傍乃有石級齒齒蜿蜒壁間者往脩覺寺道也曰姑舍是

尋中徑數折上有亭翼然祠杜工部李供奉蘇端明方正學方有石刻詩可讀亭後數武爲寶華寺禮佛畢反自亭出山門左行竹樹純駁夾砌數折卽脩覺寺寺前雙井一井直一塔唐物也明皇書嵌佛殿左側巖壁上字方廣三四尺一字各專一石飛翥沈着且甚完好予入蜀所見唐碑獨此耳出寺無所見欲返寺僧指石隙一小徑才容足出此徑乃有平田大陸復緣磴數折上轟然瀕江者曰雪峰兩寺乃在其下始悟所云磴去頂四五之一者第可指脩覺耳非此峰也左眺稠稷山如旅行而稍居其傍下憑欄視

江則已正無所不見不若初所見江之從其下左方也然從下上脩覺去江稍遠從脩覺上雪峰視江乃反近舟中所指江干削壁者卽着脚處也降自雪峰復遶井塔下屈曲一二里許不復見所由寶華寺徑矣乃忽得所謂石級齒齒壁間往脩覺寺道者則今還道也與初所從徑合徑窮登輿是日抵彭山宿

### 茂州

史記曰南越破後冉駝等皆震恐請臣置吏武帝元鼎六年以冉駝爲汶山郡守華陽國志汶山郡有六夷羌胡羌虜白蘭蚰九種之戎牛馬旄氈斑罽青頓

芼蕤羊羖之屬特多雜藥名香土地剛鹵不宜五穀惟種菽麥而多冰寒盛夏凝凍不釋故夷人冬則避寒入蜀傭賃自食夏則避暑反落歲以爲常蜀人謂之作五百石子也○禹貢岷山導江註曰江水出蜀西南徼外東至岷山而禹導之郡縣志岷山在茂州西北最後番曰列鴛村村有岷山名曰鐵豹一曰羊膊則分水之上源也一自西南入大渡河一自正南人溢村經石紐過汶川水經曰岷山在蜀郡氐道縣大江所出東南過其縣北又曰江水自天彭關東逕汶關而歷氐道縣北註云岷山卽瀆山也水曰瀆水

矣又謂之汶阜天彭闕亦謂之天谷也秦昭王以李  
冰爲蜀守冰見氐道縣有天彭山兩山相對其形如  
闕謂之天彭門亦曰天彭闕江水自此已上至微弱  
荀卿曰江出於岷山其始出山也其源可以濫觴焉  
益州記曰大江泉源始發羊膊嶺下緣崖散漫小大  
百數殆未濫觴東南下百餘里至白馬嶺又自白馬  
嶺廻行十餘里至龍涸又八十里至西陵縣又西北  
二十里至汶山故郡乃廣二百餘步又西南百八十  
里至濕坂江稍大矣○河圖括地象曰岷山之精上  
爲井絡帝以會昌神以建福古蜀謠云汶阜之山江

出其腹帝以會昌神以建福郭璞岷山贊曰岷山之  
精上絡東井始出一勺終至森溟作紀南夏天清地  
寧漢書注岷山一名鴻冢一名沃焦在隴山南首故  
稱隴蜀山直上六十里括地志云中國山川東北流  
其維首在隴蜀正義曰岷江發源隴山東北流入渤  
海水經注漢延平中岷山崩壅江水三日不流楊雄  
自岷山投賦江流以弔屈原名曰反騷也王羲之與  
周益州書云想足下鎮彼土未有動理要欲及卿在  
彼登汶領峩眉而還實不朽之盛事又與謝安書云  
周益州書述蜀山川如岷山夏含霜電校之所聞崑

崙之伯仲也○山海經云岷山神馬首龍身祠用雄雞瘞用黍則風雨可致焉郡國志岷山俗謂之鉄豹嶺陵陽李新詩在昔岷峨神龍文而馬首卽鉄豹之形也○華陽國志宣帝地節元年武都白馬羌反使駱武平定之因慰勞汶山吏及百姓詣武自訟謂歲再度更賦至重邊人貧苦無以供給求省郡郡建以來四十五年武以狀上遂省汶山郡復置都尉○唐茂州都督府壁記云貞觀初置羈縻州九曰維翼笮塗炎徹向冉穹維州今威州翼州今疊溪所笮以下則皆白狗羌矣其時一州所領不過數十里而已○

寰宇記云梁普通年於此置繩州取桃關之路以繩爲橋也繩橋之法先立兩木於水中爲橋柱架梁於上以竹爲絙乃密布竹絙於梁繫於兩岸或以大竹落盛石繫繩於上又以竹縷布於繩夾岸以木爲機繩緩則轉機收之智猛法師所謂水崖皓然百千餘仞飛絙爲橋乘虛而過窺不見底仰不見天寒氣慘酷影戰魂慄是也又有度索尋橦之橋大江水峻極如箭兩山之脇繫索爲橋中刻木爲橦拴繫行人於上以手自緣索到彼岸則旁有人爲解其系尤極危險陸游詩度索臨千仞梯山躡半空卽此○方輿云

相公嶺亦名茂濕州之主山也州治內有雪峰堂又有列岫堂鄭微列岫堂記云九頂列於南屏風臺盤列於西巨人橐駝列於東又有練光亭王咨留題云汶江自徼外東繞汶川郡西北出極目可百里許每朝陽舒彩夜月流天之際一望水光若萬丈長虹夭矯其上而吐吞之也舊有亭曰觀瀾據城之隅不與景會因取少陵賦岷山沱江圖川蜺飲練光之句以練光題其額云○碑目唐刺史黃堂梁記爲寶曆元年刺史竇季餘大中三年刺史劉成師咸通三年刺史蓋巨源題又云張延賞脩城記載唐大曆十四年

吐蕃大下火焚郊館興元元年張延賞重脩其後別駕大夫脩建城宇堡壁雉堞又云唐迴車院碑刺史蓋巨源撰大中十三年立又云茂州治平寺碑寺舊在外緣叛羌董阿丹焚毀元豐初移剏城中○勝覽云巨人山在州南三十里山頭有石如人立面南玄宗幸蜀時以石人背立勅令鞭之一百下有九池俗傳是九龍湫其湫四山環遶百二十里○又云雞宗山在州西四十里扼羌人出入之路熙寧九年置鎮羌寨按宋史熙寧九年靜州楊文緒導番董阿丹作亂聲援俱絕至書木牌投于江以告急朝廷遣內使

王中正將兵旁出雞宗山擊之文緒等伏誅碑目云  
政和丁酉倅貳跨鼇先生李新目擊靜州之變記載  
其事甚詳名更生碑今在更生閣○演繁露云蘇易  
簡言本朝使人至西番見有老人消縮如小兒伏梁  
上雞窠中乃其見在子孫九代祖也其說甚怪丙申  
十月十六夜寓直玉堂閱史見貞元間韋臯攻吐蕃  
其所攻州名有維保松及鷄栖老翁城予欣然自笑  
曰易簡之說豈因此二城名而增飾之耶按寰宇記  
茂州西北至吐蕃栖鷄城下或卽此處

### 汶川縣

華陽國志漢嚴皇后爲汶江尉成都人仲昱少受學  
於皇后及爲汶江以書呼昱昱許十月往會夷反斷  
道昱期必往經渡六十幾歿數四卒得至汶江乃爲  
皇后陳策俱得免難遠近欽之按漢武置汶山郡卽  
置縣曰汶江矣○水經註曰江水又逕汶江導汶出  
徼外岷山西玉輪坂下西南行又東逕其縣而東注  
於大江水經又云江水歷氐道縣北有湍水入焉註  
曰水出綿道亦曰綿虎縣之玉壘山呂忱云一曰半  
沅水也下注江按汶川本漢綿虎縣地矣○寰宇記  
云玉壘山在縣南三里又有玉輪坂其下汶水所經

蜀中俗解  
謂之玉輪江山出璧玉卽郭景純所謂玉壘作東別  
之標者○勝覽云七盤山去汶川縣九里志云卽玉  
壘關也賈島送玄巖上人歸西蜀詩玉壘山中寺幽  
深勝槩多藥成彭祖搗頂受七輪摩去臘催今夏流  
光等逝波會當依糞掃五嶽徧頭陀○勝覽云慈母  
山在青城山東導江人馮大量與神仙相遇入隱此  
山外史云滋茂龍池在汶之尤溪萬山叢立中有方  
池週四十里廣幾百畝清水鏡開芳草四積真靈境  
也登真書云滋茂池龍一曰慈姥在益州西南四百  
里有靈藥可以已疾山無毒害猶慈姥焉故曰母田

况益州龍祠記云蜀之西山有池曰滋茂亦曰慈母  
以其能興雲雨救旱暵林養百穀而名唐開元中章  
仇兼瓊旣得平戎城夢一女子謂曰我此城之龍也  
今弃戎歸唐願有以居我章仇異之表爲立祠按總  
志慈母山在縣南百五十里昔有婦人引子采藥山  
中虎負其子去母逐虎不得因長號而絕見者哀之  
曰慈母也則其所載又不同矣碑目云滋茂池善應  
廟碑張商英無盡處士文其神或傳姓吳或傳姓郭  
頗有異同○勝覽云龍洞在牛溪鎮入洞數步向南  
石壁有穴可通無路可陟掌洞道人附巨竹一枝於



穴內令遊人扳竹而上可達龍池○文同茂州汶川縣勝因院記云繇玉壘南下過笮迤西循皂江左折越太平渡行深入曲無慮六十里至茂之汶川有地曰柘平羣山却立大陸初露畦麻贈稻杳遠空濶披孺帶麓壤土鮮潤景物瓌麗人物純篤就其佳處有院曰羅漢昔有頭陀德欽戒操甚嚴歲臘居久其徒委散是身獨在常懼其所將底墮落願擇高行屬以香火得永康軍大中祥符寺僧義海者付之至惟簡師凡五世也准簡性顛潔所趣端慎守僧律作佛事癯形晦面不避風雨遠近四衆咸宗仰之旣至此地

乃圖崇飾伐木鑿崖大輯材礎構廣廈設尊像儲秘典納淨侶凡所欲有一一完具殆逾一紀功力方絕以名上列乃錫今號庭堂虛敞檐宇飄動丹明碧照績繡岩谷誠歸嚮之福地而莊嚴之道場也惟簡余之邑人遠來求紀其事間嘗謂余曰青城諸峰惟大岷最爲高厚然丈人上清之望者乃世俗之所能見爾如吾所居正向其面脉絡表裏披斂出沒澗壑鈎蔓巒嶺曲折高林巨樾巍崗險頂晨霞夕靄染漬輝耀湍瀑淙激禽虫啼響一日萬狀無有窮極鬼眼傾耳不知厭倦此方外清絕之境世間奇偉之觀而惟

簡輒擅有之山林之人所獲多矣安得君之車馬一  
至其地以幸吾言之不誣余聽其說袞袞令人喜聞  
回視此身若處泥窞何時濯洗以從師傲兀於其間  
哉因命筆綴次其事使歸琢諸崑石遂以爲記云熙  
寧二年十月十五日

### 威州

漢徼外冉駝之地蜀劉禪時姜維馬中等討汶川叛  
羌其屯兵之處號爲姜維城唐武德七年白狗羌首  
領鄧賢佐內附於姜維故城置維州以統之至上元  
之後河西隴右州縣皆陷吐蕃贊普更欲圖蜀州累

急攻維州不下乃以婦人嫁維州門者二十年中生  
二子及蕃兵攻城二子內應城遂陷吐蕃得之號無  
憂城外史云古維州在今保縣之外可八十里其對  
面有無憂城三面臨江巋然峰頂寔諸夷之襟喉中  
國之要塞也李文饒籌邊樓故址存焉今棄爲徼  
矣按僞蜀永平二年改維川郡爲保寧縣徙就中州  
城卽今治也州治後卽玉壘山蜀後主觀湔江至此  
親書玉壘山三字於州署其大盈丈左有龍洞焉湔  
水自玉壘峽出而注爲泉有魚長可徑尺州人以爲  
神魚無敢捕者○本志云州城原爲汶川縣址城內



